

Nioqutissanik eqqusuinermi akitsuutit pillugit Inatsisartut inatsisaata allanngortinneqarneranik Inatsisartut inatsisaat.

Nioqutissanik eqqusuinermi akitsuutit pillugit Inatsisartut inatsisaata allanngortinneqarnissaa pillugu Naalakkersuisut siunnersuutaat Partii Naleqqamiit imannak oqaaseqarfigissuarput.

Aallaqqaasiullugu Partii Naleqqamiit erseqqissaqqissuarput nioqutissat akitsuutaasa qaffanneqarnissaat Partii Naleqqamiit isumaqatiginagulu akuersaarsinnaanngilluinnaratsigu.

Soorlu tamanna pillugu 2016-imut inatsisartut aningaasanut inatsisissatut siunnersuutip 30. September inimi maani siullermeerneqarneranu aamma ersarissumik nalunaarutigigipput. Soorunami Partii Naleqqamiit aamma naatsorsuutigilluinnarparput inatsisartunut ilaasortat arlallit aamma naalakkersuisoqatigiit partiivineersut ilaasa tusagassiuutit aqputigalugit nioqutissat akiisa qaffanneqanninnissaannik oqariartuuteqarnertik aaliangiusimassagaat.

Suliami uani naalakkersuisut paatsiveerusimaarnerannik ersersitsisut ilagaat, Naalakkersuisut allannguutissasut siunnersuutip atuutilerfissaa, inatsisissatut siunnersuummi suliap saqqummiunneqarneraniit atuutilissasoq siunnersuutigierarlugu, suliamut oqaaseqaatini nalinginnaasuni § 2-imi siunnersuutip 1. Januar 2016-imi atuutilernissaa oqaatigimmassuk, maannakkullu allanngueqqinnerut kingorna aamma inatsisissatut siunnersuutip atuutilerfissaa suli nalorninarpoq, tassami siunnersuut maanna saqqummiunneqarnerminiit atuutilissasoq Naalakkersuisunit siunnersuutigineqarpoq, kisiani inatsit sunaluunniit siullermiiginarlugu atuutilersinneqarsinnaanngitsoq tamatta isumaqatigiissutigisinnaangunarparput, tassami siunnersuut ullumi siullermeerneqareerpat pilersaarutit malinneqassappata suliaq aappassaanneerqassoq 10. November pingajussaanneerqassallunilu 17. November.

taamaattumik suliaq suliarilluangaasutut oqaatigineqarsinnaanngilaq.

Taamaammallu Partii Naleqqamiit nioqutissat akitsuutaannik qaffaaqqinniarnermut akerliunitsinnut makku pissutingaagut:

1. Nunatsinni inuit aningaasanik inuussutigisinnaasaminnik, ineqarnermut allarpassuarnullu atugassaminnik isertitaqartartut naatsorsueqqissaartarfiup

naatsorsugai naapertorlugit inuit katillugit 41.572-juupput, taakkunanga inuit 25.927-it, tassa 62,4 %-it taamaallaat ukiumut 200.000,- kr-it tikiinnarlugit isertitaqartarput.

2. oktoberip 28-ani naalackersuisut apeqquteqarnitsinnut akipput, A/S INI paasissutissiivoq 2014-imi attartukkani 139-ini attartortunik anisitsisoqarsimasoq, 2015-imi 31. august 2015 tikillugu, suliassanit 907-init politiinut ingerlateqqinneqartunit, attartukkani 163-ini anisitsisoqarsimasoq. Tassunga sanilliukkaanni 2014-imi suliassat 860-it politiinut ingerlateqqinneqarsimasut. Anisitsinerit amerlanerpaartaat ineqarnermut akiliuteqartannginnermik pissuteqartut.
3. Aggusti qaammat naatsorsueqqissaartarfiup kisitsisaatai naapertorlugit inuit suliffissaqanngitsut 2.712-inik amerlassuseqartut ilisimatinneqarpugut, taakkunanga suliffissaqanngitsut aprilimi paasissutissiissutigineqarmata, taamanikkut naalackersuisut ilisimatitsipput, suliffissaaleqisut affaasa missai inuusuttuusut 18-niik 34-it tikillugit ukiullit,
4. Aningaasanut 2016-imut inatsisissatut Naalackersuisut siunnersuutaat qiviarutsigu tassani ilaatigut aalisartut, nunatsinni aningaasarsiornikkut pingaaruteqarnerpaat ilaat aappaagumiit ukiut missingersuusiortuusut ilanngullugit katillugit 165 mio kr-inik aalisakkanik sinerissap qanittuani pisassaminnik akitsuusiiffiginiarneqarput,
5. Taakkua saniatigut aalisarnermi siuarsaanissamut aningaasaliissutaasartut 5 mio kr-it, aalisartut siunnersorneqartarnerannut aningaasaliissutit 2,5 mio kr-it, kiisalu ajunaarnersuaqartillugu aallarteqqinnissamut atugassiissutaasartut 1,6 mio kr-it Naalackersuisuniit peerniarneqarput, aamma aalisartuniit suli 20 mio-inik akitsuutitigut aalleqqinniarsarisarpoq.
6. Utoqqaat siusinaartumillu sulisinnaajunnaarnersiuteqartut ukiuni tulliuuttuni sipaarfiginiarfigineqarnissaat siunnersuutigineqarput,
7. Taakkua saniatigut innuttaasut nunatta inuisa 1/3-liisa missaat maannamut danmarkimut nunanullu allanut qimarrannerat isiginngitsuusaaginnarsinnaanngilarput,

Taamaattumik Naalackersuisut inuiaqatigiinniit aningaasat sipaarutiginiagaat taakkuinnaalluunniit innersuusutigalugit aamma nioqqutissanik akitsuuseqqinniarnerat Partii Naleqqamiit akuersarsinnaanngilluinnarparput.

Taamaammat Partii Naleqqamiit siunnersuutigaarput aningaasat innuttaasut ajornartorsiuteqareeqisut kasarfiiniit aaniarsarinagit, periarfissat allat atorlugit sipaarniarnerit ugartorneqartariaqartut !

Partii Naleqqamiillu makku aningaasanik aallerfissatut siunnersuuteqarfigissuagut:

1. Pisortat suliassaataannik sularinnittussarsiuussisarneq aaqqissuuteqqinneqarniarli, taamaaliornikkut suliffeqarfiit maani nunami pigineqartut, maanilu najungaqartunik suliassaqartitsisut salliutillugit suliakkerneqartarnissaat qulakkeersimaneqaqqullugu, suliassat avataaneersunik tigoorarneqarnerat, aningaasarpasuillu nunatta avataanut annissorneqarnerat killilertariaqalerpoq !
2. Namminersorlutik Oqartussat ukiut tamarluinnaasa 90 mio kr-it pallillugit sillimmasiinernut danmarkimut nunanullu allanut aningaasat aniatitaat allatut

aaqqissuussinikkut maani nunatsinni kaaviiartillugillu sulisinneqarnissaat anguniartariaqarparput aamma aningaaseriveqarnikkut pappilissanillu nalilinnik niuernikkut aaqqissuussinerit atorlugit aningaasarpassuit nunanut allanut annissuunneqartuarnerat killilersimaarneqartariaqalerpoq,

3. Siunnersortinut nunatta avataaneersunut agguaqatigiisillugu ukiut tamaasa 200 mio kr.it tungaanut atortakkavut, nunatsinniillu aniatitavut killilertariaqalerpavut,
4. Meeqqanik inuusuttuaqqanillu paarsinerlunnerujussuarput, pingaartumik meeqqat inuusuttuaqqallu angerlarsimaffiup avataanut inissinneqartartunut ukiut tamaasa milliardit kr-it sisamararterutaanik atuisarnerput nalilersorluartariaqalerparput.
5. Nukissiorfiit ukiut tamarluinnaasa kiak silaannarmut iluaqutigineqarani aniatitaat ukiarmi Naalakkersuisunut apeqquteqarnitsigut paasivarput ukiut tamaasa 39 mio kr-it missaani naleqartoq maangaannaq eqqaripput, taamaakkaluartoq Naalakkersuisut aaqqiiniarnissamut piumassuseqannginnertik apeqqummut akissuteqarnermikkut ersersitaat assut pakatsinarpoq,
6. Imeq nilaallu tiguinnarissat aamma erngup nukinga, nunatta avammut niuerneranut siunissamilu aningaasarparujussuarunik pissarsissutigisinnaasaraluarput annerusumik Naalakkersuisuniit iluaqutiginiarneqannginnera aamma apeqquteqaateqarnitsigut paasivarput.

Qularnanngilaq aamma allanik aningaasarpassuarunik aallerfissaqarsinnaavugut pissutsit ullumikkutut ittut allanngortilaarnissaannut politikikkut piumassuseqarnerungutta, tamannalumi pingaartumik qineqqusaarnermi kingullermi partiit tamarmiulluta qinersisartunut neriorsuutigaarput, kisianni piffissanngormat susoqarpa ?

Nunatta karsianut aningaasanik isaatitsinissamut periarfissanik ulikkaarpugut aamma aningaasarpassuarunik peqareeraluarpugut iluamik atorluanngisatsinnik - periutsinik allannguinnissamut aaqqissuusseqqinnikkullu iluarsaaqqinnissaq politikikkut piumassusikinnerup kisimi uninngatippaa.

Taama naatsumik oqaaseqarluta Naalakkersuisut siunnersuutaat tamakkiisumik itingartipparput - siunnersuutigalugulu suliap aappassaanneerseqannginnerani aningaasat amingaatigineqartut periarfissaniit allaniit aamma siunnersuutivut innersuussutigalugit aningaasaqarnermut akileraartarnermullu ataatsimiititaliami suliareqqissaarneqassasut.

Anthon Frederiksen